



PERIODISMO

SU IMPORTANCIA PA UN SOCIEDAD INFORMA!

Imaginabo lanta dialuna mainta, y bo ta desea di sa tur locual a sosode durante e fin si-man. Imaginabo cu un familiar serca ta fayece y ningun persona a corda bisabo. Imaginabo cu gobierno ta hasi cierto cosnan cu tin efecto riba bo, y bo no ta altura. Trata na imagina acontecimientonan mundial cu impacto riba bo pais y bo no por haya informacion. Imaginabo un horcan asercando nos costananan y abo preparando un dia di bbq na lama.....esaki ta djis pa ilustra un bida sin noticia!!

Cu e introduccion nos por nota e implicacion cu falta di informacion tin riba bo bida. Implicacionan familiar, social, politico, di seguridad, internacional, di tempo of naturalesa ta algun di e ehemplonan menciona.

E difusion di informacion ta un el-

emento central den relacionnan humano. E difusion di informacion cu nos conoce awe ta prensa skirbi, periodismo radial of televisa y tambe cybernetico. Otro forman cu antes tabata usual mas, ta difusion di informacion pa medio di un persona, dirigiendo su mes na un grupo of publico.

Segun e encyclopedia cybernetico liber Wikipedia: *prensa skirbi ta e conhuntio di publicacionnan imprimi riba papel, cu presentacion di ario of periodico, destina principalmente na difusion di informacion of noticia, particularmente riba actualidad pero tambe di entretenimiento.*

Cu otro palabra e periodista ta e persona cu ta dedica su mes basicamente na busca informacion y difundi esaki na comunidad. E ofishi di e periodista mes, ta mes antiguo cu e origen di e derecho di lib-

ertad di expresion. Ya for di aña 1789 den e declaracion di derecho di hende homber e derecho pa publica pensamentonan expresa tabata estableci y ta prohibi e Estado pa eherce censura riba esaki. Diferente ta e tipo di periodismo cu nos conoce. Asina bo por papia di periodismo economico, politico, scientifico, deportivo, internacional, cultural, investigativo y otronan.

Durante e luna di September diferente nacionan ta celebra dia di prensa. Na Aruba esaki a sosode dia prome di September. Rond di mundo tres di Mei ta e dia oficial proclama pa Nacionnan Uni como dia mundial di *libertad di prensa*.

E importancia di Prensa pa un sociedad por ser ilustra den e rol cu prensa ta despliega entre gobierno y comunidad.

Prensa: un factor de influencia

Prensa ta un actor importante den un sistema democratico. Motibo di esaki ta cu prensa ta hunga un rol importante riba e formacion di opinion publico, cu na su turno por tin influencia riba e sosten pa un gobierno. Prensa ta e canal intermediario entre e pueblo y e gobernante. Prensa den e sentido aki tin e rol di gatekeeper, caminda cu e ta filtra e necesidad y preocupacion cu ta reina den comunidad.

Periodistanan hopi bes ta confronta nan mes cu contratiempo pa por yega na obtene e informacion cu e ta desea. Con prensa lo por desplega nan tarea na un mihor forma?

Condicion pa prensa eherce su tarea:

- E derecho cu comunidad tin pa ricibi informacion for di prensa ta mara na e deber di politiconan pa duna informacion na medionan di prensa.
- Politiconan mester ta consiente cu nan tin e obligacion pa duna prensa tur informacion cu esaki ta desea, dentro di cuadro legal y etico. E deber y obligacion aki ta sali for di e principio di transparencia den gobernacion, cu ta un elemento importante pa e bon funcionamiento di un democracia.
- Prensa mester tin e libertad di informacion y comunidad obhjetivamente, sin temor pa e consecucionan cu esaki por trece cune.
- E periodista mester tin e experticio y abilidadnan pa desplega su trabou na un manera eficiente, corecto y profesional.

Prensa na Aruba

Na Aruba por constata diferente puntonan debil cu prensa en general ta confronta cune. Den cierto caso prensa no por wordo mira como responsabel pa cu e puntonan aki. Pero alabes hopi bes e periodista mes no ta conciente di e importancia y necesidad di obhjetividad di informacion. E forma sensacionalista di trece noticia por conduci hopi bes na informacion negativo riba bida priva di un personahe. Esaki por ta un politico of un personahe den comunidad. Es decir cu sensacionalismo ta tuma lugar di obhjetividad.

Influencia politico den e plantanan di television, emisoranan local y riba medionan di prensa skirbi ta constantemente

presente y ta resulta e.o. cu noticia y programacion ta subhjetivo.

Tambe por nota un falta di preparacion adecua y periodismo investigativo, y esaki ta resulta den un nivel periodistico relativamente abou. Ademas esaki tin como consecuencia cu generalmente no tin un discusionnan profundo, critico y al caso riba topiconan politico. Of isuenan politico complica ta wordo presenta den un forma simplistico y incompleto.

E mercado di nos isla hopi bes no ta consiente di e importancia di informacion obhjetivo, esaki ta conduci cu e demanda pa periodismo di nivel y pa informacion obhjetivo ta abou. També actornan politico y of gobernante hopi bes ta carece di boluntad pa duna informacion obhjetivo.

Algo cu no por wordo mira como culpa di prensa ta e scarcedad na informacion. Hopi informacion encuan to maneho no ta disponibel y/of accesibel.

E PASONAN PA PERIODISMO DI NIVEL

Aruba ta un pais joven. E desaroyo economico cu nos a conoce durante e ultimo 20 aña ta uno remarcabel. Paisnan rond di nos ta mira Aruba como un ehempel di un 'success story'. Pa prensa na Aruba tambe conoce e success story aki ta importante pa esakinan hunto cu comunidad berdaderamente reconece e importancia di informacion obhjetivo. Pa loke ta trata e lector lo mester purba na yega na e otro banda di medaya di un hecho of un situacion cu a presenta pa despues bo saca bo propio conclusion. Asina abo como lector ta aporta na bo propio huicio critico y bo ta bira un persona mas obhjetivo.

Un fundacion cu ta maneha fondonan y prepara programanan cultural di educacion, politica, deportivo y ta percura pa esakinan wordo presenta na television. Resultado di esaki por nifica un crecimiento di demanda pa programanan di mihor nivel.

Otro metodo ta pa medio di profesionalisacion di periodistanan of reportahe riba areanan specialisa. Profesionalisacion por ser alcanza pa medio di cursonan of exigencia di un educacion profesional pa reporteronan. Specialisacion periodistico ta encera cu periodistanan ta enfoca of specialisa riba cierto areanan cu alabes ta contribui na periodismo investigativo.

Lo ta importante pa studia e posi-

bilidad di habri un centro di research, pa aporta na informacion mas detaya y studia. Esaki lo por sosode pa medio di ayudo financiero for di Europa of Hulanda. Un proyecto asina den cuadro di integridad den maneho alabes e derecho di cada ciudadano di ricibi informacion corecto, lo por wordo acorda.

Organisa seminarionan; e ta un di e formanan cu por aporta na eleva periodismo en general. També pa mehora e calidad di informacion ta bon pa doñonan di e medionan duna e reporteronan e posibilidad pa sigui cursonan (paga dor di e dunador di trabou), y workshops. També por pensa riba beneficiar salarial atractivo pa personanan cu un educacion mas avansa, asina stimula reportero y periodistanan den un mihor educacion.

Mas opinionan/editorial riba nos sistema politico for di personanan cu un amplio conocimiento riba dicho topico y di reputacion intachable por ta esencial den mehoracion di calidad di noticia. Huristanan lo por contribui na esaki na momento cu cierto ley wordo implementa, muestra comunidad riba resultado y consecucionan cu esaki por tin pa nos.

Documentonan necesario lo mester ta disponibel. Procedura y canalnan via cual medionan di prensa mester ricibi informacion riba material di politica, mester ser mehora y actualisa. Unabez cu e documentonan ta accesibel, lo contribui na cu e periodistanan lo por eherce nan trabou den un forma mas eficiente cu resultado cu nos como comunidad lo beneficia di esaki.

Pa comunidad mes, lo ta importante (aunke cu esaki ya caba ta ser haci pa medionan skirbi) pa presenta mas articulo di indole social, di salud, riba avancen tecnologico, topiconan internacional, problemanan cu hobennan ta confronta etc.

E luna mester ta pa nos un ocasion di reflexion, pa tur e periodista y tambe comunidad y gobierno cu e responsabilidad no solamente ta di e periodista y esnan laborando den prensa, sino e responsabilidad ta di nos tur. ■

E articulo aki ta un compilacion di un estudio haci dor di diferente expertonan aki na Aruba riba e topico di periodismo e.o. drs. Paul Croes, drs. Andy Lee, sr. Armand Hessels, drs. Nilky Kock y drs. Yolanda Richardson.